


# La Titanic al Lai Rivaun – amur, dolor e happy end

Ils musicals han carmalà passa 200 000 aspectaturs a Walenstadt

■ (anr/vi) I empermetta da puspè da-ventar in spectachel particular per tuts che gaudan patos e kitsch. La «Walensee-Bühne» preschenta quest onn il musical Titanic sco producziun per il giubileum da diesch onns. La proxima mesemna è premiera a Walenstadt e fin ils 29 d'avust èn planisadas passa ventg producziuns. Quest onn n'èn ils aspectaturs betg pli suttoposts a plievgia e chaliras. La tribuna d'aspectaturs survegn in tetg. Tuttina regia l'atmosfera dal spectachel en il liber cun ina culissa grondiusa. Il Lai Rivaun va bain a prà cun la tematica – almain per quels che han avunda fantasia da s'imaginar il lai sco ocean ed ils culms ordenturn sco spitgs da glatsch.

## Autra story ch'il film

L'avrigl 1912 sfundra la Titanic – da lez temp il pli grond bastiment dal mund – en l'ocean circa 500 kilometers avant las rivas da Neufundland. Passa 1500 persunas vegnan per la vita. Questa tragedia è restada fin oz en memoria grazia a blers films e cudeschs. L'ultim film cun Leonardo DiCaprio e Kate Winslet procura che era la generaziun giuvna sa regorda vinavant da la disgrazia. Remartgabel è



Costums opulents e culissa grondiusa – ils musicals a Walenstadt porschan daletg per egl e cor.

MAD

ch'in eventiment cun tantas unfrendas vegn adina raquintà sco istorgia d'amur en ils films.

Ma la story dal musical n'è betg la medema sco quella dal film, era sch'i va puspè per in pèrin inamurà. Entant

ch'il film lascha najar ses protagonist jugà da DiCaprio en las fraidas undas sa lubescha il musical in happy

end per il giuven pèrin e per ils aspectaturs.

Autras persunas principalas dal musical èn Alice Bean, passagiera en la segunda classa, che siemia d'ina vita en la high society u Bruce Ismay, il possessur dal bastiment, che vul exnum cuntanscher en temp da record New York e scriver lettras grassas cun ses bastiment. Il chapitani ed il constructor dal bastiment admeschan adumbatten.

## Profi-giugadurs ed orchester

En Titanic stattan 24 giugadurs da professiun e plirs statist sin tribuna al Lai Rivaun. L'orchester suna live ed è medemamain occupà cun profis. Cun sustegn dal maun public e sponsurs privats ha la «Walensee-Bühne» a disposiziun in budget da tshintg milliuns francs cun il qual ins po porscher ina culissa pompusa e costums opulents.

Quest onn èsi la sisavla giada ch'i vegn manà si a Walenstadt in musical. Avant diesch onns avevan ins dà l'entschatta cun il musical Heidi. Lura èn suandads inscenaziuns da «Die Schwarzen Brüder», «Tell» e «My Fair Lady». 280 000 aspectaturs han guardà las represchenta-ziuns ils ultims diesch onns.